

## *ASO FARAILE, 30 IUNI 2023*

*Na nofoia e le Fofoga Fetalai le Nofoa i le itula e 9.32 i le taeao.*

Tatalo.

**FOFOGA FETALAI:** Ou te faasilasila atu ua amatalia nei Taulumaga a le Fono Aoao Faitulafono.

Ia mapu ane ia i fagatoaga ma le tuapaga na avaava ai le va o Lealatele i le malumaunu ma le maualuga o le Fonousu a le Atunuu. O lea ua musamusa le Tama ua tofuola foi le vai o le Aloalii na ono i ai pou o le Maota. O upu a le Atunuu a gafoa ata o le taeao o lona uiga e tua i le taulaumea. O lea ua sola le nuu tu tai ae lalaga mauga talimalama. Ua maleifua mai le lagi e mama ma le soifua manuia le paia o le tatou Maota i lenei taeao fou, a o le toe aso foi o le tatou galuega i lenei masina na lagatila ma salifoea aua e le faigofie le sailiga o figota o le moanauli.

O le viiga la ma le loto faafetai tatou siia'e i lo tatou Atua, o Ia ua mafua ai mea uma, o Ia na o tatou mafaia ai mea uma, o Ia ua matala ai faamanuiaga o lenei aso fou. Fo'i atu pea le viiga ma le faaneetaga ia te ia e le aunoa ma tatou avamagalo ia i Lona alofa i lenei taeao fou. E asaasa gata le foufeula o le afimusaga ae sili ona auaugata lelei o le alapae i paia ma mamalu o le Palemene o le atunuu. O mamalu e mai lava i le vavau e oo i le faavavau, o lea ua opo i le Maota i Tiafau nei.

Le afio o lau Afioga i le Tamaitai Palemia ma lau Kapeneta aea le lagolago a le Saofaiga a Afioga i Minisita Lagolago. Afio lau Afioga i le Taitai o le Itu Agai ma le mamalu o sui usufono uma o le Palemene. O mamalu e afua mai le oneone sā seia paia le oneone sinasina i le faletapaau i le si'u i sisifo. Nuunuu atu ia leaga o oe o le i'a e iviivia o le i'a foi e auaugata.

Le paia o Ofisa Sili o Pulega o a Matagaluega ma Faalapotopotoga Tumaoti a le tatou Malo, sagai ane ai o le tai i lau tapuaiga i lenei aso.

Lau tapuaiga mamana ma lau tapuaiga leleoa Samoa o le fogaa i totonu o le moana sausau e malu ai lau Palemene.

Le paia e o le Palemene ia too i le Atua so outou finagalo ina ia sao ma uli le toe aso o le tatou galuega, folau ma le poto i le faatuatua, faasoa ma le poto i le faatuatua. E lototele le Fofoga Fetalai aua o le tofa ma le uta a le tatou Maota e matala ai tapu o le uluvai.

Ia agalelei le Atua i le alofaiva o le Palemene i lenei aso.

## TUUINA ATU O PEPA

*Na tolaulauina e le Failautusi i le Fono Aoao le faasologa o Pepa e tusa ai ma T.T.49(2).*

1. P.P.2023/2024 Nu.37, Lipoti a le Komisi Suesue o le Faigapalota 2021 Fepuari 2023.
  2. P.P.2023/2024 Nu.38, Lipoti Faaletausaga a le Pulega o Tagata Tafafao Maimoa mai mo le Tausaga Faaletupe 2021/2022.
- Ma le faaaloalo lau Afioga.

## LAFO A LE KOMISI FAAPALEMENE

**FOFOGA FETALAI:** Tulai mai lau Afioga i le Sui Taitaifono o le Komisi, lau Afioga Auuapaa Mulipola Aloitafua Mulipola.

**Afioga AUUAPAAU MULIPOLA ALOITAFUA MULIPOLA (Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae):** Lau Afioga i le Fofoga Fetalai, e tusa ai ma Tulafono Tumau 170(2) ou te faatu ai le lafo, *Ina ia faamaonia e leni Fono Aoao le filifilia ma le toe faatulagana o sui usufono o nisi o Komiti Faa-Palemene e pei ona fautuaina e le Komisi Faa-Palemene mo le faamaonia e le Fono Aoao ma e faapea;*

1. *Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae (Standing Orders, Electoral Petitions and Constitutional Officers Committee), ua filifilia ma tofia i ai le Afioga Aiono Tile Gafa e suitulaga i le Afioga ia Hon Loau Solamalemalo Keneti Sio.*
2. *Komiti o Tupe Maua ma Tupe Totogi, ua filifilia ma tofia i ai le Afioga ia Lautimuia Uelese Vaai e suitulaga i le Afioga Laumatiamanu Ringo M. Purcell.*
3. *Komiti o le Vaega Tau le Vafealoai, ua filifili ma tofia i ai le Afioga Lautimuia Uelese Vaai e suitulaga i le Afioga Niuava Eti L. Malolo ma le; tofia i ai o le Afioga Hon Loau Solamalemalo Keneti Sio e suitulaga i le Afioga Aiono Tile Gafa;*

Ma le faaaloalo lava lau Afioga.

*Faahuaina e le sui usufono mo Gagaiformauga 2 ma le sui usufono mo Vaisigano 1.*

*Na faamaonia le lafo.*

**TULAFONO TAU FAAOFI O LE FAATATAUINA O TUPE  
2023/2024 -felafolafoaiga faaauau i luga o le faitauga faalua  
- Aso Fono Iona 9**

**FOFOGA FETALAI:** E tolopo Tualumaga a le Fono Aoaio Faitulafono i le po anapo ua maea ona Saunoa Talifuaitau le Afioga i le Tamaitai Palemia i Mataupu sa laga i saunoaga faalauaitete a sui usufono o le Palemene.

Ia, o le avanoa lenei mo lau Afioga i le Minisita o Tupe e te saunoa talifuaitau ai i mataupu sa laga e sui usufono mamalu.

Lau Afioga i le Minisita o Tupe.

**Afioga Hon MULIPOLA ANAROSA ALE MOLIOO (Minisita o Tupe):** Faafetai i lau Afioga i le Fofoga Fetalai o le Maota. Ou te faatalofa foi i lau Afioga i le Fofoga o le Fono, lau Afioga i le Tamaitai Palemia, lau Afioga i le Sui Palemia, le saofaiga o Minisita o le Kapeneta, saofaiga o Minisita Lagolago aemaise ai foi le Taitai o le Itu Agai e le o mafai ona auai mai, aemaise foi sui usufono o le Maota. Le Failautusi o le Fono ma le Ofisa o le Fono, le saofaiga o Ofisa Sili o Pulega o Matagaluega aemaise ai Faalapotopotoga Tumaoti a le tatou Malo. O le tapuaiga i Ekalesia i so o se fata faitaulaga, aemaise ai foi le tapuaiga faaleaganuu.

O le fatupese a Eperu, a ou vaai atu i lou lagi, o le galuega a ou tamatamailima, o le masina atoa ma fetu na e faia. O ai ea le tagata e te manatu mai ai ia te ia ma le Atalii o le tagata, e te asiasi mai ai ia te ia? O ananafi e tapena ai nei, o nei e tapena ai taeao. O le fesili lau Afioga i le Fofoga Fetalai. Pe fai mo ai taeao? O le 10 ai nei o aso talu ona tauavamea ma tatou faatalatalanoa le Tala o le Tupe. O le saofaiga i totonu o le tatou Maota a le Palemene, e 51 Itumalo. E talitonu o le leo lea o Samoa atoa, o sui usufono o le tatou Maota ua avea lea ma leo fofoga o Itumalo taitasi e aumai lo latou sao e tusa ai o le Tala Faatatau Autu o le Tupe.

O le po anapo lau Afioga i le Fofoga Fetalai, na mae'a ua tuneva le po, ae matauina ma le toto o lo o faapena ona i ai pea le lagona o le tautua. Aisea? Ona o le tatou valaauina na tofofi ai i tatou e o tatou Itumalo e avea ai i tatou ma leo se i i ai so tatou sao aua le tamaoiga o Samoa.

Faafetai lau Afioga i le Fofoga Fetalai, malo le faatoatoa. E talitonu e ese foi le vaaiga i lenei vaitaimi i lou afio mai i lou nofoaga o lo o faamalumalu Iesu Aagalofa Mamana. O lo o faamalumalu i ou tiute ma ou faiva aua le taitaiina o lenei Maota, ae o ona ave malolosi o le toto ma le vai o lea o lo o faamamalu ai totonu o le Maota o le Palemene. I lalo ifo o le Iesu Aagalofa Mamana o lo o i ai le Upu - Jesus I trust in You, Iesu e ou te talitonu ia te oe.

O le Autu o le tatou 60 tausaga talu ona Tutoatasi Samoa, na faamanatuina i le tausaga lea faatoa mavae atu nei ia Iuni - Folau ma le Faatuatua. E matauina i saunoaga ma fetalaiga le tatou Tala Faatatau Autu o le Tupe, e \$1 piliona. O le fesili, aisea? E le o ata vaaia lea o le tatalo a o tatou ositaulaga, le Aiga Sa Mekisateko i so o se fatafaitaulaga lea ua oo ai le faasoa a le tamaoiga i le \$1 piliona. E le o le ata lea o le Samoa laalaa. E le o le ata lea o lo outou sao taua a sui usufono taitasi o le tatou Maota, aemaise ai Samoa o lo o alaala ma papaaao i so o se tafa o le lalolagi. E le o le ata lea o le sao taua o a tatou pisinisi tumaoti, o le malosiaga e tua i ai lo tatou Malo. E tele luitau, ae a ou toe tomanatu ina ua fola le Paketi muamua a le tatou Faigamalo, tuai ona tatou taunuu mai. O le aso 14 o Setema sa fofola ai le Tala o le Tupe, e lua masina le tuai. O lea ua tatou taunuu mai i le lona tolu ai lenei o Paketi po o Tala Faatatau Autu o le Tupe a le tatou Atunuu, e lagona le lotomauualalo.

E faafetai ae i le Alii ona o Lana faasoa, o Lana faasoa limalelei lea ua tatou vivii ai i le Alii. Ma o tatou fesili ane, o se tulagaese lea ua i ai le Paketi a Samoa. Ia fo'i le viiga i le Atua. Aisea? O tatou na ona fuafua a o le Atua e faatupu, o le Atua e faatino, o le Atua e faaata mai. E maua foi i saunoaga ma fetalaiga, o le Tala Faatatau Autu o le Tupe ua na o ni moemitiga, ua na o ni fuafuaga. Ae tau atu ma le manino, a faapea sa tapena le tatou Tala o le Tupe i le tausaga atoa, o lona uiga o le mea e tupu. Aisea? O le sao o tatou Matagaluega taitasi, o taleni ma agavaa e silasila ifo ai lava le Ofisa Sili ma lana Matagaluega, manaoga o lo o taoto ai lea Matagaluega ma Matagaluega lea e ala ai ona tino le tatou paketi. O lea e ala ai ona faatino le tiute ma le matafaioi a le tatou Matagaluega o Tupe, tuufaatasi i lona aotelega, a ia atagia ai le mea o lo o ave i ai le faamuamua a le tatou faigamalo.

Ua maea folasia le tatou taiala o le lumanai manuia o Samoa, o i ina le ala. A vaavaai atu le tatou Matagaluega o Tupe ua se i le isi itu pe ua tele i le isi itu, o le tiute ma le matafaioi a le tatou Matagaluega o Tupe, e tuutuu mai totonu. A silasila atu le Ofisa Sili o le Matagaluega o Tupe ma le afaigaluega ua i ai nai vaega e le talafeagai e ono afaina ai i le Tulafono, faamanatu pea le Matagaluega o Tupe. Ia tuualalo pea le Matagaluega o Tupe. A i ai se mea ua talosaga mai ai a tatou Matagaluega taitasi e le gafataulimaina, e avatu pea le leo ma le fautuaga ma le tuualalo a le tatou Matagaluega o Tupe, e le lava le faasoa. O le tiute lea ma le matafaioi a le tatou Matagaluega o Tupe.

E i ai foi le seleulu, tulou, a le tatou Matagaluega o Tupe. A talosaga mai, ia ua lelei foi le otioti a le tatou Matagaluega o Tupe. Aisea? Ia gafataulimaina le faasoa, ia i ai manaoga uma a tatou Matagaluega ma ia atagia i totonu o le tatou Paketi mea e ave i ai le faamuamua. E tele luitau o le tatou folauga, e le na ma le laina, e oo mai le tatou faigamalo ua i ai le faamai i totonu o tatou laufanua. O mala faalenatura i suiga o le tau, o

gasegase o upufai a Malo. Ae viia le Atua, o lea lava ua tatou vaaia ataata o taulelei. O i ina e aumai ai se malosi i lou tulaga faa-Minisita o Tupe. Aisea? O le sao taua o tagatanuu uma o Samoa lea e i totonu o le tatou Tala o le Tupe.

Se i tagai i tupe faamomoli, po o le a lava le malaga a le Samoa, tuua aiga e pele. Ua malaga i fafo, usu i le malulu e le faigofie le olaga i fafo. A o lana sailigamalo, e susue pea le faamalama ma vaavaai mai i si ona aiga. E vaavaai mai i si ona tina, o si ona tama, o le aiga, o le fanau, Ekalesia, o le atunuu ma lafo mai tupe faamomoli i totonu o Samoa nei. O lo outou sao taua lea. O lea tou te malaga mai ai pe a faapea e 10 tausaga e te le i toe malaga mai Samoa, o lea e te molimauina ai suiga tetele i lo tatou atunuu. E foi le viiga i le Atua ona o Lana faasoa limalelei.

Lau Afioga i le Fofoga Fetalai, na ou faailoa atu i lau folasaga autu o le Tala Faatatau Autu o le Tupe i le mamalu o le Palemene, o le tele o le taumafaiga a le Malo ua mafai ona tino mai. E ui lava i luitau na tatou feagai ai, ae sa mafai lava ona ausia nei atinae ma faiga faavae ma faamanuiaina ai le toatele o le tatou atunuu ona o le faamuamua a le tatou Faigamalo.

E moni ai se tasi o mau tauave, o le faia o se mea masani i se faiga e le masani ai, ma sili atu ona lelei le faiga, o se auala faalilolilo lea i le manuia. The secret of success is to do the common thing uncommonly well. A lelei ma sili atu ona tatou atiaaina o tatou tagata, o lona uiga e manuia uma le atunuu ma manuia atinae faatino.

Lau Afioga i le Fofoga Fetalai, ae le i oo atu se faamatalaga i vaega na fesiligia e nisi o sui usufono mamalu o le Maota e faatatau i le Tala o le Tupe, e fia tuuina atu muamua sina faamatalaga puupuu e faamanino atili ai le Vaai Taulai mo le Tamaoaiga. Aemaise ai o le faamoemoe mo faiga faavae ma Tupe Faatatauina e pei ona soalaupuleina nei e le Fono Aoao Faitulafono mo le tausaga faaletupe fou 2023/2024.

Lau Afioga i le Fofoga Fetalai, e i ai nisi o mau sa faaleoina e faapea o le siitia o tupe i aao o le mamalu o le atunuu, aua le uunaia o fefaatauaiga po o le consumption mo le faatupulaia o le tamaoaiga, e ono siitia ai le tau o le soifuaga pe a fua i le Law of Supply and Demand.

Lau Afioga i le Fofoga Fetalai, e pei ona ou tolaulauina atu i le lauga mo le Tala Faatatau Autu o le Tupe fou 2023/2024 i le aso 30 o Me, e le tasi se faiga faavae a le Malo o le a faatino ai le tausaga faaletupe fou. O le Consumption ua na o se vaega e tasi o le tamaoaiga ae tele isi vaega o le tamaoaiga lea e faamoemoe o le a uunaia e a tatou atinae ma fesoasoani e faamamaavega i le tau o le soifuaga, e tauala atu i le faatupulaia o alatupe maua ma alamanuia mo le atunuu.

E pei o vaega ia: Muamua, atinae tetele a le Malo, o le a uunaia ai le vaega maoti o Felauaiga ma Atinae, Transport and Infrastructure Sector

aemaise le tulaga i pisinisi fau auala ma fale tetele po o le Construction Industry.

Lua, toe tatalaina o tatou femalagaaiga i atunuu mamao faatasi ai ma le toe tatalaina o le malae vaalele i Fagalii, o le a uunaia ai le Vaega Maoti o Tagata Tafafao mai po o le Tourism Industry.

Tolu, o fesoasoani tupe a le Malo, e tauala atu i le Faletupe o Atinae (DBS) ma le Samoa Business Hub, mo le uunaia ai o le vaega o pisinisi e fesoasoani i le faatupulaia o tupe maua a pisinisi tumaoti, ua taua o le Micro, Small and Medium Enterprises. Faaauauina o atinae o nuu ma alalafaga aua le faatamaoigaina o itumalo e ala atu i le polokalame o le \$1 miliona.

Uunaia ma mataituina le faatinoina o faiga faavae tau tupe, Monetary Policy aua le pulea lelei o Faletupe po o tatou Commercial Banks ma tulaga tau tupe i totonu o le atunuu.

Lau Afioga i le Fofoga Fetalai, o le tuufaatasiga uma o nei faiga faavae ma polokalame, o se fuafuaga talafeagai. O le a faatinoina e le Malo e fesoasoani e faatupulaia ai lo tatou tamaoiga aemaise le tali atu i le tau o le soifuaga.

Lau Afioga i le Fofoga Fetalai e pei ona silafia, sa tauaaoina faatasi e sui usufono mamalu o le Fono Aoao Faitulafono le lomiga o le lauga o le Tala o le Tupe ma le Faamatalaga o Fuafuaga mo Tupe a le Malo po o le Fiscal Strategy 2023/2024 i le aso 30 o Me.

O le vaega muamua o lenei lomiga lau Afioga i le Fofoga Fetalai, o lo o auina atu ai taunuuga na ausia e le faatupulaia o le tamaoiga, tulaga o aitalafu a le Malo faatasi ai ma taunuuga na ausia i le faatinoina o Tala o le Tupe mo tausaga faaletupe ua tuanai.

A silasila sui usufono mamalu i le itulau e 6, o lo o auina atu ai taunuuga po o actuals na ausia i Tala o le Tupe mai le 2019/2020 e oo mai le 2021/2022. O lo o atagia mai, e ui i le vaai taulai mo faasiliga o Tupe Alu i Tupe Maua, Budget Deficit, sa mafai lava ona faamauina le faasiliga o Tupe Maua ma o lo o faamatala auiliili atu ai mafuaaga o nei taunuuga.

Lau Afioga i le Fofoga Fetalai e ui i le feagai ai o le Tamaoiga ma faalavelave tutupu faafuasei i tausaga faaletupe e tolu ua tuanai, e le i atagia mai ai ni suiga tetele i le aotelega o tupe maua masani.

O le tausaga faaletupe 2019/2020 na mafai ai ona aoina le \$638.6 miliona faatusa i le \$573.5 miliona sa fuafuaina ma faamauina ai le faasiliga e \$65.1 miliona po o le \$11 miliona o le faasiliga o Tupe Maua a le Malo.

Faasolo mai le 2020/2021 na faamauina ai le siitia maualuga o Tupe Maua masani na aoina ai e \$644.2 miliona faatusa i le na o le \$517 miliona o tupe na fuafuaina e aoina.

O le tausaga faaletupe 2021/2022 na aoina ai le \$631 miliona faatusa i le \$574 miliona ma ausia ai le faasiliga e \$57 miliona po o le 10% lona faasiliga.

E \$93 miliona lea ua faamauina ai foi le faasiliga o tupe maua masani ua mafai ona aoina mai ia Iulai 2022 e tau mai le aso, pe a faatusa i le \$650 miliona, tupe na fuafua e aoina mai le \$747 miliona, o lea ua aoina.

O lenei faasiliga i Tupe Maua masani na uunaia malosi le toe tatala ai o tuaoi faava-o-Malo, faapea le siitia malosi o Tupe Maua mai Lafoga, e pei o lafoga i luga o oloa ma auaunaga mai fafo. E pei ona faailoa atu i le Tala o le Tupe 2023/2024, o le aotelega o Tupe Maua a le Malo, o le a siitia i le 12% ma o le a uunaia tele lea e tupe maua masani a le Malo. O lenei siitiaga e afua mai i le faatupulaia o lafoga aoina e tusa ma le 13% e ui i le ono faaitiitia o tupe maua e ese mai lafoga e tusa ma le 1%.

E le gata i lea, o lo o aofia i lenei Tala o le Tupe nisi o vaega o lo o fuafua, e aoina mai ai ni tupe maua fou a le Malo, e i ai tupe totogi mo le faaaogaina o le Maota mo Aganuu, Samoa Arts and Culture Center ma Tupe Totogi mo le faaaogaina o le Malae i Matagalalua, Friendship Park.

Lau Afioga i le Fofoga Fetalai ua ou laga lenei tulaga, ona sa faaleoina e nisi o sui usufono mamalu e faapea, talu ona tulai mai lenei faigamalo ua na o Deficit na faamauina. Ae o lo o maioio i faamaumauga na tuuina atu, le faaaauuina pea ona mataituina lelei e le Matagaluega o Tupe i luga o le faamalumaluga ma fautuaga a le Kapeneta i tulaga tau tupe a le Malo, e oo mai i le tausaga faaletupe lenei.

E le natia foi le tulaga sa aafia ai le tamaoaiga o Samoa ona o le Koviti-19, ma sa alagatatau ai ona faaaauu pea le maualuga o tupe faaalu a le Malo, aua le toe faaleleia o le tamaoaiga.

O le faatupega foi o nei Budget Deficit e pei ona manino i Tala o Tupe i tausaga taitasi, o General Budget Support o lo o tuusaoina mai i a tatou paaga mo atinae faapea ai ma reserves a le tatou Matagaluega o Tupe.

Lau Afioga i le Fofoga Fetalai o le vaai taulai foi mo le tau o le soifuaga, afai e faaaauu pea tulaga lelei o lo o matauina nei e Faalapotopotoga Tau Tupe a le Lalolagi e aofia ai le IMF ma le World Bank, e ono faamanuia le tau o le soifuaga i le na o le 5% i le faaiuga o le tausaga faaletupe o lo o loma nei 2023/2024.

E pei ona ou lauga atu ai i fonotaga a le Palemene ua mavae, o le aafiaga tele i le tau o le soifuaga o lo o matauina nei e afua mai le siitia o le tau o le suauu talu mai le taua i le va o Rusia ma Ukraine i le amataga o le tausaga 2022.

Mo le silafia e lau Afioga i le Fofoga Fetalai ma sui usufono mamalu, o le tau o le tiso sa faamauina mo le tausaga 2019/2020, e tusa ma le \$2.70 i le litre annual average, ae sa faamauina le pau i le \$2.30 i le litre

i le tausaga 2020/2021. O le tausaga lea ua tuanai atu nei 2022 e tusa ma le \$3.68 i le litre le tau o le tiso sa faamauina i lona aotelega.

O lona uiga lau Afioga i le Fofoga Fetalai, po o le a lava le faiga faavae e faatino i luga o le tau o oloa e pei ona saunoa ai nisi o sui usufono mamalu, a maualuga lava le siitia o le tau o le tiso, o le a tumau foi le maualuga o le tau o oloa. E pei ona silafia o le tiso lea e tele ona faaaogaina mo afi eletise, afi mo pamu o le suavai, faatasi ai ma vaa lauolaoa. A siitia le tau o le suauu, e siitia uma lava tau o le gaosiina o oloa ma auaunaga aemaise le auina mai o oloa mai atunuu i fafo.

Lau Afioga i le Fofoga Fetalai, sa laga i se tasi o faauilavea i le tulaga o aitalafu a le Malo ma le faamatalaga e faapea, ua iva tausaga talu ona le toe faia ni nonogatupe a le Malo. Lau Afioga i le Fofoga Fetalai ma sui usufono mamalu, o se tulaga e fia faasao, o le nonogatupe mulimuli sa sainia e le Malo o Samoa, sa faatinoina lea ia Tesema 2017, e ono tausaga talu ai. Ma o se nonogatupe mai le Faletupe o Atinae a Asia po o le ADB i lona aofaiga e US\$3.1 miliona. O leni nonogatupe o se vaega o se fesoasoani tuusao mai a le ADB, general budget support e tusa ma le US\$6 miliona. E \$2.9 miliona e tuuina mai faameaalofa, ae \$3.1 miliona sa tuuina mai faanonogatupe. O le vaegatupe leni e \$3.1 miliona sa faagataina lona faaaogaina ia Tesema 2022, ma o lea sa faaaogaina ai lea vaegatupe e fesoasoani mo le faatupeina o le Tala Faaopoopo muamua o le Tupe mo le tausaga faaletupe leni 2022/2023.

O le sini autu o leni fesoasoani, o le siitia lea o le mafai ona tali atu o le Malo i aafiaga o faalavelave tutupu faalenatura, faalavelave faafuasei e aofia ai ma suiga o le tau, ma aafiaga faale-soifua maloloina. E pei ona taua i taimi ua sola, o le paleni o nonogatupe a le Malo o lo o fuafuaina mo le faaiuga o le tausaga nei 2022/2023 e tusa ma le \$934 miliona, e aofia ai le external debt e \$933 miliona ma le domestic debt e \$1 miliona.

O le vaai taulai mo le tausaga o loma nei 2023/2024, o le a siitia le domestic debt mai le \$1 miliona o lo o i ai nei i le \$52.1 miliona. E atagia ai le tauaveina e le Malo o le nonogatupe tele a le Samoa Airways sa faia i le UTOS. A e o le a pau le paleni o external debts mai le \$933 miliona i le \$791 miliona.

I lona aotelega, o le a faaitiitia le paleni o nonogatupe a le Malo i le \$844 miliona i le faaiuga o le tausaga faaletupe 2023/2024. Lau Afioga i le Fofoga Fetalai e tusa ai ma faamaumauga o lo o faaauau le faaitiitia o paleni o aitalafu a le Malo talu mai le tausaga 2019 ina ua amata ona faamaea nisi o poloketi sa faatupeina mai nonogatupe sa faia ae faagasolo pea le tologiina o nonogatupe. Aemaise o le naunautaiga a le Malo, e le toe faia ni nonogatupe fou ae faaauau le tologiina o aitalafu ina ia tuuitiitia.

E valu ni nonogatupe a le Malo sa agavaa i lalo o leni fesoasoani e aofia ai nonogatupe e 6 sa faia mai le XIN Bank a Saina, tasi mai le Malo



Iapani faapea ai ma le tasi mai le European Economic Community po o le EEC e tauala mai le Faletupe o le Lalolagi. E tolu ni vaega sa faapea ona faatino ai lenei fesoasoani ma e fitu tausaga e toe totogiina ai lenei vaega o aitalafu sa faamuta mo se taimi le tumau e aofia ai ma le tasi tausaga o le grace period.

Vaega muamua, tupe totogi mo aitalafu mai ia Me 2020 ia Tesema 2020.

Vaega lona lua, toe faaauau le fesoasoani mo tupe totogi uma mo aitalafu mai ia Iuni 2021; ma le

Vaega tolu, toe faaopoopo le taimi o lea fesoasoani ma faamaea ai le faaiuga o Tesema 2021.

O le tuueseai o le totogiina o nei vaegatupe sa faapea ona faatuai ai le tuuitiitia o le paleni o aitalafu a le Malo o lea ua amata ona toe togitogiina le vaega muamua ma le vaega lua o lenei fesoasoani e pei ona taua muamua.

Tulaga o aitalafu a le Malo. Mo le silafia e le Palemene mamalu o faamaumauga ma lipoti o aitalafu mo Kuata taitasi e tuufaatasia e le Matagaluega o Tupe. O lo o faamauina ai i le faaiuga o Tesema 2022 vaega nei;

O le aofai o aitalafu a le Malo faamauina e \$903.5 miliona, o lenei aofaiga e \$902.4 miliona paleni o external debts ae \$1.1 miliona le domestic debt.

E valu creditors po o faigapaaga a Samoa ma Atunuu, Faletupe ma Faalapotopotoga sa faia mai ai nonogatupe. E pei ona iai paleni o aitalafu, o lo o faaauuina pea le totogiina e le Malo i tausaga taitasi. A faapasene le paleni o aitalafu a le Malo ia Tesema 2022, o le Faletupe a le XIN Bank a Saina e 39.9%, Faletupe o le Lalolagi po o le World Bank 30.5%. Faletupe o Atinae o Asia 20.5%, o le Malo Iapani 7.3%, Faalapotopotoga o Atunuu o lo o faatauina falesuauu OPEC 1.6%, Faaputuga tupe mo atinae mo faatoaga 0.3%, Faletupe mo Atinae Europa 0.3% ma le UTOS 0.1%.

O tuutuuga ma aiaiga sa faia ai nonogatupe o le tele o nonogatupe sa faia lava i tuutuuga mama e aofia ai tului maualalo e amata mai le .45% e oo atu i le 8.5% tului i le tausaga.

Atinae sa faatupeina i nonogatupe po o le Loan funded Projects. O le taimi nei e 56 le aofai o nonogatupe a le Malo o lo o togitogiina e aofia ai le domestic debt loan e 1 mai le UTOS ma external loans e 55, e 23 nonogatupe mai Faletupe o le Lalolagi, 20 mai Faletupe o Atinae o Asia, 6 mai le Faletupe a Saina, 2 mai le IFAD, 2 mai le OPEC ma le 1 mai le EIP ma le tasi mai le JICA.

O nisi nei o Atinae tetele sa faatupeina mai nonogatupe i totonu o le 10 tausaga talu ai: Muamua, faaleleiina o le malae vaalele i Faleolo e aofia ai le runway ma le paka mo vaalele mai le Samoa Aviation Investment Project po o le atinae lea sa faatinoina ai.

Lona lua, Budget support loan mo fesoasoani i tamaoaiga.

Tolu, Poloketi mo vaega o faatoaga, Samoa Agriculture Competitiveness Enhancement Project po o le SACEP.

Fa, Polokalame mo soifua maloloina e aofia ai le faaleleia o nisi o Falemai Faaitumalo, fausiaina o le warehouse mo vailaau ma fualaau i le Falemai i Motootua. Faaleleia ma le faalateleina o aualatele mai Malifa agai atu i Lepea, Vaitele Street, Poloketi ma malosiaga tau eletise, le fausiaina o le afi tele i Fiaga, fausiaina o le terminal mo le malae vaalele faavaomalo i Faleolo. Falemai i Motootua ma le ofisa o le Matagaluega o le Soifua Maloloina, fale mo ofisa o le Malo le TATTE ma le Samoa Convention Center.

O le poloketi mo le vaega o fesoootaiga mo le Samoa National Broadband Highway po o le SNBH, Ofisa ma le Fale Faamasino i Mulinuu ma le fausiaina o tane suauu mo le teuina o le suauu i Sogi ma Faleolo.

O vaega ia lau Afioga i le Fofoga Fetalai o lo o faatinoina i tatou nonogatupe, faamalumaluga a le Malo po o a tatou Government Guarantees. Lau Afioga i le Fofoga Fetalai o nei faamalumaluga e tele lona aafiaga i luga o aitalafu ma tala o le tupe a le Malo pe a le lelei lona fuafuaina ma le mataituina.

E tusa ai ma le lipoti o faamaumauga a le Matagaluega o Tupe i le faaiuga o Tesema 2022 e 168 miliona le aofai o government guarantees, pe tusa lea ma le 8.8% o le tamaoaiga. Sa aofia ai ma le faamalumaluga mo le nonogatupe a le Samoa Airways ua le gafatiaina ona toe totogiina e le Kamupani. O lea e tatau lava ona tuuina atu faamalumaluga a le Malo mo nonogatupe e faia e Faalapotopotoga a le Malo e mautinoa o lo o gafatia mai ana Tala o le Tupe le toe totogiina o ia nonogatupe.

E ao foi ona manino le tele o le sao o se atinae e faatupeina i se nonogatupe i le tamaoaiga lautele. O lea foi ua faagasolo faatinoga moomia o le faiga faavae mo faamalumaluga a le Malo po o le Government Guarantee Policy sa faamaonia e le Kapeneta i le 2022. O le isi vaegataua o le faatinoina o credit risk assessments mo Faalapotopotoga a le Malo o lo o iai nonogatupe ma o lo o guarantee e le Malo. Ua maea ona faatino credit risk assessment mo le Samoa Airways ma le Faletupe o Atinae a Samoa lea sa fesoasoani tele i le Malo i ana faaiuga fai. O nei credit risk assessment e faatulaga mai ai credit ratings mo Faalapotopotoga a le Malo e faailoa mai pe gafatia le totogiina o ni nonogatupe ona fua a lea o le tuuina o le faamalumaluga a le Malo. O le naunautaiga ina ia toe tapena lelei tulaga tau tupe o nei Faalapotopotoga a le Malo ma taumafai e siitia Atinae ma faamaite Polokalame faatino aua lava le auunaga tuuina atu mo se lumanai manuia o tagatanuu.

Tulaga Gafataulimaina o Aitalafu: Mo le silafia e tusa ai mai iloiloga a le IMF ma le Faletupe o le Lalolagi i tulaga gafatia o aitalafu, oloo iai pea Samoa i se tulaga maaleale ona o le tulaga o ana aitalafu poo le High Risk of Debt Distress Rating. O le uiga o lea faamatalaga oloo maualuga le tulaga lamatia ma luitau i le tamaoaiga o Samoa, ona o le tulaga sa faamauina ai ana aitalafu ma e aafia ai le mafai ona tali atu o le Malo pe a tulai mai faalavelave tutupu faafuasei. O nei iloiloga e aofia ai le aofaiga o aitalafu (total public debt). O le aofaiga o Government Guarantees afai o nonogatupe e faia tuusa e Faalapotopotoga a le Malo e leo iai se faamalumaluga a le Malo o aafia o Faalavelave Tutupu Faalenatura e ono aafia ai Samoa ona o tulaga maaleale i Suiga o le Tau ma le gasologa o ni atinae ma le tulaga o le Tamaoaiga. O lenei vaega e taua ai le physical target oloo iai nei ina ia le sili atu i le 50% o le Tamaoaiga (Debts to GDP Ratio) le maualuga o aitalafu a le Malo.

Ona o le tulaga o le maualuga o le High Risk of Debts Distress Rating mo Samoa ua le mafai ai e le Malo ona toe fai se nonogatupe fou mai soo se atunuu ma Faalapotopotoga i fafo seia vagana ua faaitiitia a tatou aitalafu ma e soona faafetaia ai pea le Alofa o le Atua oloo maua pea tupe e faameaalofa mai i Paaga mo atinae a Samoa e faatino ai ana atinae tetele. O nei vaega oloo o gatasi ma Taiala mo le Fuafuaina ma le Puleaina lelei o nonogatupe a le Malo ina ia aua nei toe faia ni nonogatupe fou e le māmā le aiaiga ma e faamoemoe o le a tuuitiitia a tatou aitalafu.

Lau Afioga i le Fofoga Fetalai o loo matauina i Samoa le ogatasi i le toe faafoisia o le Tamaoaiga i se tulaga lelei faapea ai ma le televave o oloa gaosi ma auaunaga. Ona o le tulaga maualuga oloo iai tupe faaagaga mo Faletupe mo fefaatauaiga ua mafai ai ona vave faaogaina poo Commercial Bank Liquidity faatasi ai ma le tulaga lelei o tupe faaagaga mo fefaatauaiga o le atunuu, ua mafai ona e le Faletupe Tutotonu o Samoa ona vaavaai i le ono suia ona faiga faavae i le tulaga tau tupe i se vaitaimi lata mai. O lea e ono silasila le Faletupe Tutotonu o Samoa e faatino ni auala e aofia ai le faamatuu atu ai i tua o aiaiga mo nonogatupe o le Faletupe Tutotonu e faaitiitia ai tupe faaagaga mo le faagaioia o Faletupe mo Fefaatauaiga ma le toe fetuunaiga o le tupe tului aloaia poo le reset a le official interest rate. Mo le silafia o nei Faiga Faavae mo le tulaga tau tupe ua silia ma le 15 tausaga ua tuanai o faaauau pea le tulaga fesoasoani tau tupe e aofia ai ma le faamaualaloina o tului aua le unaia o le tamaoaiga, aemaise ai foi le mafatia o Samoa i Faamai Pipisi le Misela ma le Koviti 19 ma tulaga i Faalavelave Tutupu Faafuasei.

O le tulaga maoae o loo iai nei tupe faaagaga mo fefaatauaiga a le atunuu (Foreign Reserves) o se avanoa o le a mafai ona tali atu i le tulaga maualuga i le tau o oloa ma auaunaga e afua mai i le siitia o manaoga o le atunuu ona o le siitaga o tupe maua mai i totogi, o tupe faamaloloi ma

tupe maua mai tagata tafafao mai faapea ai ma tupe faameaalofa mo atinae mai a tatou Paaga.

E fiafia foi e faailoa atu e oomai ia Aperila 2023 ua ausia le 9716miliona tala ole tatou foreign reserves pe tusa ma le 10 masina, ma e mautinoa e ono ausia le 1pilionia i le faaiuga o lenei tausaga faaletupe.

Muamua, lau afioga i le Fofoga Fetalai e avea foi lenei avanoa e toe faapupula atili atu ai le siitaga o totogi o tagata faigaluega i totonu o Matagaluega, o lenei siitaga o lea faatinoina i le 2 Tausaga Faaletupe 2023/2024 – 2024/2025 ona e fua i luga o tupe maua a le Malo aemaise foi e ao foi ona fai se manatu i le Private Sector ina ia lava foi se taimi e tapena ai ni a latou siitaga pe a talafeagai e pei foi ona maea saunoa iai le Taitaifono o le Komiti o Tupe. Ma e faapea lona faatinoga;

Lua, O le a siitia i le 10% le totogi faaletausaga mai le totogi amata a le Malo e faagata mai i totogi o Ofisa Sinia maualuga. E 7% e faatino i le tausaga muamua ae 3% i le tausaga lona lua.

Tolu, e 5% o le a siitia ai totogi oi latou e i luga atu o Ofisa Sinia maualuluga ae lalo ifo i le avanoa o le Ofisa Sili o Pulega . E 3% pasene e faatino i le tausaga muamua ae 2% i le tausaga lona lua.

Fa, mo totogi o Ofisa Sili o Pulega ma tofiga Taualoa o le a siitia i le 3%, e 2% e faatino i le tausaga muamua ae 1% i le tausaga lona 2.

E 24.6miliona tala le tau aofai o le siitaga o tagata faigaluega e toa 8831. Mai lea aofaiga e nao le 16.99miliona oloo atagia i totonu o le Tala Faatatau Autu o le Tupe 2023/2024 e faatino ai le vaega muamua. E 7.6miliona o le a tuuina atu i le Tausaga Faaletupe 2024/2025 e faamaea ai le faatinoga o lenei siitaga e tali atu i le maualuga o le tau o le soifuaga.

O le COLA (Cost of Living Adjustment) o le a faatupeina mai i tupe maua a le Malo faapea ai le fesoasoani mai a le ACC e pei ona iai le 10miliona mo le Tausaga Faaletupe 2023/2024 ma o le a toe tapa foi se isi fesoasoani e faamaea ai lea siitaga o le Tausaga Faaletupe 2024/2025 e pei ona faamaonia e le Kapeneta faatasi ai ma tupe maua fuafuaina mo lea tausaga faaletupe, ma e amata faamamalu lenei siitaga o totogi o tagata faigaluega a le Malo i le aso 08 Iulai 2023 pe a pasia le tatou Tala o le Tupe.

O le tulaga i le mataupu sa laga e nisi o Sui, sa iai muai faafetai ai i le fesoasoani mo a tatou tagata faigaluega a le Malo. Lau afioga i le Fofoga Fetalai e pei ona silafia oloo faaauau pea fesoasoani a le Malo mo Vaega Tumaoti e pei ona iai le 3miliona mo Pisinisi Laiti e tauala atu i le Ofisa Tutotonu mo Pisinisi Laiti (Samoa Business Hub) mo le isi 3miliona mo Pisinisi feololo e tauala atu i le Faletupe o Atinae o Samoa.

Lau Afioaga i le Fofoga Fetalai e iai foi nisi o Sui mamalu na fesiligia le vaegatupe lea e faamoemoe e faamatuuina mai i le ACC e fesoasoani ai i le faatinoga o siitaga a le Malo. Lau afioga i le Fofoga Fetalai e pei ona silafia e leo se taimi muamua lenei ua fesoasoani mai ai le ACC i le tatou

Tala o le o le Malo, o le tausaga Faaletupe 2020/2021 lea foi sa faamatuuina mai le 10miliona mai i le ACC sa fesoasoani tele i le faatinoina o le fesoasoani a le Malo lea na tuuina atu ai le tai 50\$ i le tagata mo tagatanuu uma ia Oketopa i le 2020. Oloo fesoasoani mai foi le ACC i le faatupeina le fausiaina o Ofisa o le Malo i atunuu i fafo aemaise ai foi o tupe tuusao i Faalapotopotoga a le Malo aua auunaga fesoasoani e aofia ai le Pulega o Tineimu ma le Pulega o Felauaiga ma Femalagaiga i luga o le laueleele.

E iai foi nisi o sui mamalu na fesiligia le faatinoina o nisi o Polokalame ma Fesoasoani a le Malo, ma e fia tuuina atu sina faamatalaga puupuu i luga o le faatinoina o nei fesoasoani. Fesoasoani mo Tagatanuu e iai Aafiaga Tumau o le Soifua. O le aofaiga atoa o lenei fesoasoani sa faamaonia i le Faatatau Autu o le Tupe 2022/2023 i le masina o Iuni 2023 e 2miliona tala. O le faaopopoga e tusa ma le 501,700.00 sa pasia i le Tala Faatatau Faaopopo muamua o le Tupe lea na pasia muamua i le masina o Fepuari 2023 e faatinoina ai le faaopopoga o le tai 50\$ ua nao masina o Me ma Iuni 2023. Oloo aofia ai foi i lenei faaopopoga nisi ua leva ona lesitala i le lisi a le Matagaluega o Tina ma Tamaitai Atinae o Alalafaga ma Agafesootai ae sa tuai na tuuina mai faamaoniga ma numera o tusi tupe ina ia mafai ona tuuina atu ai latou faamanuiaga, e amata mai le aso sa lesitala ai. O lea la ua toe faafoi le vaegatupe sa uluai faamaonia.

O le faatinoina o lenei fesoasoani sa faatulafonoina i lalo o le Tulafono o Tupe Faatatauina mo le Tausaga Faaletupe 2021/2022 ma le 2022/2023 e pei ona faatinoina ai le faamatuuina atu ai le tele o fesoasoani a le Malo e pei o le fesoasoani na tuuina atu i Faletalimalo ma Pisinisi Laiti i le 2021/2022 ma le 2022/2023.

O le Sini ma le Auga o le Teuteuga o le Tulafono a le NPF e pei ona pasia e le Fono Aoaofaitulafono o le faapopoina lea o le faamatuuina atu o lenei fesoasoani i lalo o tiute ma galuega faatino a le NPF o le Tausaga Faaletupe 2023/2024 o le a faamatuu atu ai loa lenei vaegatupe mo lenei fesoasoani moi latou e iai Aafiaga Tumau o le Soifua i le NPF mo le faatinoina.

**FOFOGA FETALAI:** Ua ou vaelupeina le saunoaga a lau Afioiga i le Minisita, talu ai ona o lea ua tatou taunuu mai i le tatou malologa o le Aso Faraile o lea ua i ai le manatu o le a faaauau lau saunoaga pe a toe taliu mai i le tatou malologa.

*Na faataatiaese Taulumaga a le Fono Aoaofaitulafono mo lana malologa masani i le itula e 10:30 i le taeao ma toe faaauau i le itula e 11:00 i le taeao.*

*Na toe faaauau felafolafoaiga i luga o le faitauga faahua o le Tulafono Tau Faaofi o le Faatatauina o Tupe 2023/2024.*

**FOFOGA FETALAI:** Ou te faasilasila atu ua toe amatalia nei Taulumaga a le Fono Aoaofaitulafono.

I le toe talii mai ai o le tatou malologa, e i ai le manatu ua saoiālo le tauteaga a le paia o le Palemene Ua maua foi se faasiligamalosi e faaauau ai le tatou galuega.

E faataaiaese a tatou Taulumaga, o lo o saunoa le afioga i le Minisita o Tupe. O le mea lea ou te tapa ma le faaaloalo lau afioga mo le faaauauina o lau saunoaga.

**Afioga Hon MULIPOLA ANAROSA ALE MOLIOO:** Faafetai i lau afioga i le Fofoga Fetalai mo le faaauauina o le folasaga a le Matagaluega o Tupe.

Ae tatou te le i malolo mo le tatou faamalositino, ua oo lau folasaga i nisi foi o Afioga i sui usufono na fesiligia foi le sao o le Toomaga mo e Puapuagatia po o le Samoa Victim Support.

Lau afioga i le Fofoga Fetalai ma sui usufono mamalu o le Fono Aoaofaitulafono, e ono vaega tetele i lalo o le auivi o polokalame faatino mo leni fesoasoani. E tusa ai ma le maliega na sainia i le va o le Malo o Samoa ma le Toomaga mo Tagata Puapuagatia. O nei vaega o le a ou taumafai e oto atu mo le silafia e sui usufono mamalu.

O le vaega muamua, ua siitia auaunaga mo le faatalatalanoaina o e o lo o aafia, faatasi ai ma e ua molia. O le faatinoina o sauaga i totonu o aiga po o le counselling services. O le naunautaiga mo leni vaega, o le fesoasoani ina ia faalauteleina ma siitia nei auaunaga o le Toomaga, aua le taumafai e fofu leni faafitauli.

O le vaega lua, o le polokalame faalauiloa i totonu o nuu ma alaafaga po o le Community based prevention. O leni vaega o le polokalame, na faamoemoe ina ia taimua ai alii ma faipule faatasi ai ma tama ma alii tupulaga i le uunaia o le feau, aua le taofia o sauaga i totonu o aiga, nuu ma alaafaga. Ma o leni vaega o le polokalame, lea na faatinoina i lalo o le sini autu, “e le sau tamalii.”

O le vaega lona tolu, o le fale sulufai o le toomaga. E mo le silafia, e lima maota po o fale, o lo o faatino ai auaunaga nei a le toomaga. Ma o le matau a le Matagaluega o Tupe, o le maualuga o le numera o le fanau sa nofoia ma nofoia nei maota, na oo atu i le valusefulu tamaiti. E toatele lava i fanau teine mai le ono masina le matutua e oo atu i le 19 tausaga. O le toatele o nei tamaitai e o atu faatasi ma o latou tina, a o isi tamaitai na laveaia e le toomaga. O le fesoasoani a le Malo na faaluina lea mo le

suavai ma le eletise, aemaise ai lavalava ma le taumafataga mo le fanau. E le gata i lea, sa faatinoina foi aso fiafia ma aoaoga mo fanau.

O le vaega fa, alamanuia ma le siitia o le tamaoiga. O se tasi o taofi ua faamaonia e le Toomaga, o le tele o vevesiga i totonu o aiga, e afua mai lea i le mativa ma le limavaivai. O le sini autu o lenei vaega o le polokalame, o le taumafai lea e faatamaoigaina alii ma tupulaga i totonu o nuu ma alaafaga, ma o le vaega tonu lea, o lea sa fesiligia e nisi o sui usufono mamalu.

O le vaega lima, o polokalame faalauiloa i le atunuu atoa. I lalo o lenei vaega o le polokalame, o lo o tuufaatasi ai se polokalame faapitoa, e taimua ai tamalii o lo o aveva ma taitai o le atunuu, latou te uunaia le feau taua, o le taofia o sauaga i totonu o aiga.

O le vaega ono, o le fesoasoani mo fanau o lo o faatau savaliina oloa i le taulaga po o le child vendor assistance programe. E tusa ma le fasefulu ma ona tupu le fanau, ua mafai ona faaaogaina e le Malo i lalo o lenei polokalame. E totogi sao e le Toomaga i aoga le pili aoga mo nei fanau, faatasi ai ma le faatupeina o toniga mai pisinisi o lo o faatauina mai ai.

Lau afioga i le Fofoga Fetalai, e fesiligia ma o lo o fesiligia pea nei vaegatupe ua faamatuu atu. Ae pei ona ou otona atu, ua matuai tele le sao ma le fesoasoani a le Malo i le Toomaga aua le faatinoina o ana auaunaga taua, ma le uunaia pea o le feau mo le atunuu, ina ia tatou galulue soosootauau pea e taofia le sauaina o tina ma fanau teine i totonu o aiga. O lo o ogatasi foi lea ma le taiala autu muamua, o le faaleleia o le atinaega o le soifuaga lautele o lo o i le taiala mo le lumanai manuia o Samoa.

O le vaegatupe mo tapenaga aua le taligamalo a Samoa i le fonu tele mo faauluuluga a Malo o le Taupulega...

**Afioga Sulamanaia Fetaiai Tauiliili Tuivasa:** Lau afioga i le Fofoga Fetalai pe maua se avanoa...

**FOFOGA FETALAI:** Ua i ai le manatu o le Nofoa, se i faamaea lelei le saunoaga a le Minisita o Tupe, ona tuu atu lea o le avanoa i lo outou mamalu. O le mea lea, ia lava mai lo outou onosai, ona e tele le galuega o lo o faafeagai ma le Minisita o Tupe, ona tuu atu foi lea o le avanoa. Faaauau le saunoaga a lau Afioga i le Minisita.

**Afioga Hon MULIPOLA ANAROSA ALE MOLIOO:** Faafetai i lau afioga i le Fofoga Fetalai. O vaegatupe faatatauina, e tusa ma le \$20 miliona i totonu o le tatou paketi, e faamoemoe mo le tatou Fonotaga o le CHOGM. O le a faatinoina ai tapenaga mo vaega nei:

Muamua, o le faaleleia ma le tapenaina o maota ma potufono o le a faaaogaina e aofia ai le Tooa Salamasina o le TATTE ma isi.

Lona lua, o le tapenaga aua le puipuiga ma le vaavaaia lelei o Faauluuluga o Malo o le Taupulega ma le au usufono.

Lona tolu, o le tulaga manaomia mo le soifua maloloina, ma auaunaga tau le soifua maloloina.

Lona fa, o fesootaiga.

Lona lima, faaleleia o auala faatasi ai ma auaunaga tau eletise ma le suavai.

Lona ono, o le tapenaina o Vailima Botanical Garden. O le mataaga o le a asiasi atu ai le Tupu o Peretania.

Lona fitu, o le auaunaga faa-failautusi. E pei ona silafia, o le tausaga faaletupe o lo o loma nei, o le a ave ai le faamuamua mo tapenaga mo lenei fonotaga taua. Ae o le tausaga faaletupe 2024/2025, o le a faaagaaga mai ai le vaegatupe mo le taligamalo i lea fonotaga ia Oketopa. 2024.

O le taimi lenei, o lo faaauau pea faatalatalanoaga ma paaga, mo atinae a le Malo, i itu e mafai ai ona fesoasoani mai ai, ia tatou tapenaga.

Lau afioga i le Fofoga Fetalai, na faailoa mai e nisi o sui usufono mamalu, le matauina o le faamatuu atu o le fesoasoani a le Malo i se faalapotopotoga e tasi i tausaga uma, ae pe faapefea isi faalapotopotoga i le atunuu. Lau afioga i le Fofoga Fetalai, o le tele o nei faalapotopotoga, o lo o i ai maliega faaauau ma le Malo o Samoa mai tausaga ua mavae, i lalo foi o le faigamalo ua tuanai.

O le fesoasoani faamatuuina atu ma faatinoina e faalapotopotoga fou, e pei ona matau mai, ua maea ona faavaeina ma faataatia lelei auivi o galuega faatino. Ma ua faamaonia foi le i ai o faiga faavae e mataitu ma iloilo ai le taunuuga o galuega mo vaegatupe e tuuina atu i ai e le Malo.

O nei tulaga ua ala ai ona faafaigofie ona faaauau pea nei faiga paaga ma le Malo. E le gata ina ia faamautu ai le faaogaina lelei o fesoasoani tau tupe ae mautinoa foi le ausia o taunuuga manaomia, aua le soifua manuia ma le atinaeina lelei o si o tatou atunuu.

Lau afioga i le Fofoga Fetalai, sa laga e nisi o sui usufono mamalu, po o le a se tulaga ua oo i ai le aitalafu a le faletalimalo i le Faletupe o Atinae o Samoa. E mo le silafia e taunuu mai lenei faigamalo, o lo o taatitia aitalafu tetele a nisi o faletalimalo i le tatou Faletupe o Atinae, ua le mafai ona totogiina ma sa oo lava foi nisi o nei nonogatupe i le faamasinoga.

I le talosaga mai o nei faletalimalo i le Malo, sa galulue ai loa le Komiti Faapitoa a le Kapeneta e toe faatalanoa ma fetuunai, ni aiaiga fou mo nei faletalimalo, ina ia mafai ona toe faaauau le totogiina o latou aitalafu ma tumau ai pea le tatalaina o faletalimalo, aua le uunaia o le tamaoaiga aemaise ai o le tatou taligamalo mo le fonotaga i le tausaga fou.

Lau afioga i le Fofoga Fetalai ma le mamalu o le Palemene, e talu ona faatino lenei galuega e le Soa Komiti faapitoa a le Kapeneta, ua tele le suiga i le tali mai o nei faletalimalo, i le totogiina mai o latou aitalafu, e



pei o tuutuuga o lo o aiaia i le malilie fou o nonogatupe sa sainia. Ma o le a mataituina lelei foi e le Faletupe o Atinae nei aitalafu ina ia maea lelei le togiina.

Lau afioga i le Minisita o Aoga, Aganuu ma Taaloga, i le mataupu sa e lagaina i se vaegatupe faapitoa mo le inclusive education ua maea ona feutagai le Ofisa Sili o Pulega o le Matagaluega o Tupe ma Taitaifono o le Education Sector Advisory Committee, e pei ona faamanino ai foi e le Ofisa Sili o Pulega ma le Matagaluega o Aoga i faatalanoaga i le Tala o le tupe, ma le Komiti o le Tala o le Tupe. O lo o aofia ai le Matagaluega o Tupe, Ofisa o le Suetusi Sili ma le Komisi o o Tagata Faigaluega a le Malo, o lo o lava ma totoe vaegatupe i le tala o le tupe a le Matagaluega, e faatino ai vaega manaomia mo le inclusive education. E pei ona i ai foi le education sector budget support mai ia Niu Sila, ma Ausetalia. E le o tamau pe faapito le faaso o lea fesoasoani, mai ia tatou paaga mo le atinae ona e fua lava i vaega ua ave i ai le faamuamua a le vaega maoti o aoga i totonu o le 12 masina o le tausaga faaletupe.

O lo o aofia foi i lalo o le One Government Grant OGG mo aoga uma vaegatupe mo aoga o lo o nafa ma lenei galuega o le inclusive education.

Lau afioga i le Fofoga Fetalai, sa taua foi e se tasi o sui usufono le medical insurance. O lalo o le Tulafono a le NPF o lo o i ai le NPF Health Scheme ma le Med Insure Scheme. A o le taimi lenei e le o faatinoina ona e le i faamamaluina aloaia. Ae sa pasia le teuteuga o le Tulafono a le NPF i le 2005, ina ia mafai ai ona faatu nei teugatupe insure. E faapea na mafua ona le faatinoina ona e toatele tagata lea e faafaigaluegaina tagata na le lagolagoina, ma e taugata, e le gafatia ona totogi. E masalo o lenei mataupu insure, o le a toe silasila i ai le komiti faatonu o le NPF i se taimi o i luma.

E talitonu o lea ua maea ai le tele o fesili, atonu tou te faafofoga mai o le tele o nisi fesili sa tuuina mai, o lea sa maea tali i ai ma saunoa i ai le toatele o Minisita atonu ua faamalieina ai outou finagalo ma faamalieina ai foi le taliina atu o fesili.

Ia, ae le i seu lou vaa i fanua, e faaleoina le agaga o le faafetai i le tapuaiga a lou itumalo. Lou itumalo, e seasea ou faatalofa atu ma... ae talitonu o la outou tapuaiga leleoa, o lea lava e manuia ai faiva o la outou sui usufono. Ma ou te faafetai atu i le faafofoga tapuai mai a si ou itumalo pele, numera tasi, mai lava i Taga e tau i Foailalo aemaise ai foi le tapuaiga o ou tama ma tina faaleagaga o lo o faanonomanu aua faamanuiaga mo lou tulai mai mo lo tatou itumalo.

Ou te faafetai i lau afioga i le Fofoga Fetalai, ona o lou tiute ma lau matafaioi i totonu o lenei Maota aemaise ai foi o le lagolagosua a le Failautusi ma le Ofisa o le Fono, ua faamalo le folau.

Faafetai i Ofisa Sili o Pulega o Matagaluega taitasi, o lea ua tino mai le tatou paketi ona o lo outou sao taua, aemaise ai o le tou tiute tauave e tautua ai le tatou faigamalo.

E faafetai i le afioga i le Ofisa Sili o Pulega, lau afioga Saoleititi Maeva Betham Vaai, le Pulega ma le aufaigaluega a le Matagaluega o Tupe. O Maiava Atalina Enari Ainuu ma le tatou Faletupe Tutotonu, Tevaga Viane Tagiilima ma le UTOS, Heseti Sione Vaai ma le SLAC, Aualiitia Sine Korua. Le afioga ia Lemalu, e faafeiloai atu foi Lemalu Selesitina Puleaga, o le Ofisa Sili o Pulega lea a le tatou Ofisa o le NPF, aemaise ai foi le Pulega.

E faafeiloai atu foi ia Muaautau Raie Silipa, o le tatou Ofisa o le Faletupe o Atinae. Ma le agaga faafetai ia Tuifaasisina Sieni mai le Ofisa o le SIFA e tusa ai o la outou galuega ma le tuualalo ma le fautua mai pea i la outou Minisita, ua mafai ai ona faatino lenei galuega.

Ia faafetai i lau afioga i le Tamaitai Palemia, Sui Palemia, aemaise o le saofaiga a le Kapeneta aemaise ai foi sui usufono o le Maota i la outou lagolago, e tusa ai foi o tiute ma taumafaiga, i le tulaga o lo o faataatia mai ai le tatou Tala Faatatau Autu o le Tupe. Soifua ma ia manuia.

**FOFOGA FETALAI:** Ia malo saunoa i lau afioga i le Tamaitai Minisita o Tupe. Malo lava mo le folasaga malamalama. Atonu o lea foi ua faafogafoga ma le totoa le Maota, ia malo saunoa. Ia faafetai foi i le Matagaluega, le Ofisa Sili o Pulega ma le Matagaluega. Ia aemaise foi o Matagaluega uma a le Malo, aua le tuufaatasia o lenei Tala o le Tupe.

E faamalulu atu i lau afioga i le Minisita, ona sa i ai le sui usufono lea mo Vaimauga 1, lea sa fia fesili mai...

E a, o tumau lava lou fia fesili pe ua faamalieina lou finagalo?

**Afioga Sulamanaia Fetiaia Tauilili Tuivasa:** Ia toe tuu mai i tua lau fesili, o lea o le a ou fesili i mea taitasi, ona ua faamalieina foi lau afioga i le Fofoga Fetalai.

**Susuga Maulolo Tavita Aмоса (Sagaga 2):** Lau afioga i le Fofoga Fetalai O lea na usitaia lava lou finagalo se i maea.

**FOFOGA FETALAI:** Se i saunoa mai po o le a se mea...se mea sa e lauga ai pe o se mea faatoa oso ae nei.

**Susuga Maulolo Tavita Aмоса:** Lau afioga sa ou lauga ai. Faafetai mo le avanoa. O lau lauga faalauaitete i le Tala o le Tupe, pei lava o lau folasaga manino, sa faavae i luga o le tatou PDS. Ma ua tali mai uma isi Matagaluega i mataupu uma sa ou laga vagana ai le mea e tasi lea sa

faatali se i saunoa le Minisita o Tupe i le Priority Area 13 - Improved Accountability.

O le manaia ia o le vaega o lau saunoaga o lo o faapea mai o le galuega lava ma le tiute o la outou Matagaluega o le Tupe, a tele... e vaai atu ua tele i le isi itu, ona tau tata mai lea i le ogatotonu. O le agaga moni lava lena sa avatu ai lau folasaga faalauaitele.

Lau afioga i le Fofoga Fetalai, e na ona tuu atu o se tuualalo. E lua lava nai tuualalo ia e fia fai atu i lalo o expected outcomes i le vaega o le improved accountability, e manaomia ai le honest and timing reporting by all government services. Ua matauina le tele o tatou annual reports ia e aumai, ua le o i ai se summary ia latou tala o le tupe e tusa ma le Tulafono. O le faamatalaga e tuu mai, ona ua oo i le taimi o le deadline ua tataua ona submit mai a latou annual reports, e le i ready le Tala o le Tupe. Ae o le manaia o le tulaga lena, o le vaavaai i ai o le Komiti Faa-Palemene i aims and objectives o lea tausaga a le Matagaluega lena, ma faatusatusa i activities ia o lo o alu ai tala o le tupe po o talafeagai po o align.

E moni o lo o i ai le vaega a le audit latou te mulimuli mai fai le performance audit ae o le manaia o le mea lea ina ia improve le accountability. O le vaavaai foi i ai o lenei totino o le Palemene i ana komiti i tulaga o a outou annual reports.

Ma lona lua, o le mulimuli foi lea o le tuualalo, e manino lava le matafaioi a le vaega a le Audit e omai e vaai po o lelei ona faaoga tupe. A o se fautuaga, o le mea ua matauina e lou sui usufono, e manaia lava pe a mautinoa e le MOF ua faatino galuega o mea nei o atinae, ona faatoa release lea o payment. Ona o mea ua matauina e lou sui usufono. O se tuualalo lena. A o le mea leaga o le ave o payments ae le i faatino le galuega.

Lau afioga i le Fofoga Fetalai, e pau lava lea o sau tuualalo, manuia le tatou Fono.

**FOFOGA FETALAI:** Ia malo faafetai mo le tuualalo. Ia o le tuualalo lau afioga i le Minisita, mo le agai luma le fautuaga ua tuuina atu, ae e te le tau tali mai i ai.

E a e te fia saunoa? Ia tuu atu pea le avanoa i lau afioga i le Minisita.

**Afioga Hon MULIPOLA ANAROSA ALE MOLIOO:** Lau afioga i le Fofoga Fetalai, ua faamauina ma talia atoatoa le fautuaga lau afioga i le sui usufono.

**Susuga Maulolo Tavita Amosa:** Lau afioga i le Fofoga Fetalai, ua lava lea e fai ma ula o lenei itumalo i lenei weekend. Faafetai.

**FOFOGA FETALAI:** Malo faafetai. O lea ua maea talifuaitau le Malo e tusa o mataupu na laga e sui usufono i saunoaga faalauaitele i tulaga tau tupe a le Malo...

**Afioga Hon Lautafi Fio Selafi Purcell (Satupaitea):** Lau afioga i le Fofoga Fetalai pe maua lava se avanoa...

**FOFOGA FETALAI:** Ua tautuaupega lou finagalo, o lea ua see le sa o le Fofoga Fetalai, ma ua uma foi ona fai atu lau tala e faamaea ai le... E faamalulu atu i le sui usufono, a fai e maua se avanoa i mea taitasi, o le avanoa lena e faaleo mai ai. A o le taimi lenei, e le toe solomuli lo tatou sa ua alu.

**Afioga Hon Lautafi Fioe Selafi Purcell:** Alu a tatou, alu i luma...

**FOFOGA FETALAI:** Ua maea foi ona faatu le lafo, mo le faitauga faalua o le Tulafono Tau Faaofi i le aso 30 Me 2023, ma ua faapea ona faaluaina. O lea o le a tuuina atu loa le fesili.

*Na tuuina atu le fesili ma faamaonia ai le lafo na faatuina i le aso 30 o Me 2023 ma faitau faalua ai le Tulafono Tau Faaofi o le Faatatauina o Tupe 2023/2024.*

**FOFOGA FETALAI:** A o le i alo atu i le iloiloga auiliili o le Tulafono Tau Faaofi, ou te fia faailoa atu Faasaoga laiti ua maea ona faia i le Tala Faatatau o Tupe 2023/2024 i le:

1. Lomia Samoa i le Itulau e 43, 61, 63, 65, 80, 120, 151 – 153, 166, 199 -202, 222-224, 255 ma le;
2. Lomiga Peretania i le Itulau e 2, 4, 144-146, 193, 194, 196 ma le 216.

O lo o faailoa atu Faasaoga i le Itulau 5 faa-Samoa ma le Itulau 5 faa-Peretania o le Lipoti a le Komiti o Tupe Maua ma Tupe Totogi i le Tala Faatatau Autu o Tupe 2023/2024.

O lena foi ua tuuina atu i le Pepa Faaopoopo o Galuega 2023/2024 Nu.2 ma ua maea ona tufatufaina atu i luga o a outou laulau.

## **TULAFONO TAU FAAOFI O LE FAATATAUINA O TUPE 2023/2024 – Iloiloga Auiliili**

**FOFOGA FETALAI:** O le a sagai atu loa le Fono Aoaofaitulafono i le iloiloga auiliili o le Tulafono Tau Faaofi o le Faatatauina o Tupe 2023/2024. E mafai ona saunoa faatepa sui usufono i mataupu o lo o tusia

i le Tala Faatatau Autu o Tupe Maua ma Tupe Totogia a le Malo o Samoa mo le tausaga faaletupe faaiuina i le aso 30 Iuni 2024, e faapea foi le Lipoti a le Komiti o Tupe Maua ma Tupe Totogi i le Tala Faatatau Autu o Tupe Maua ma Tupe Totogi a le Malo o Samoa mo le tausaga faaletupe e faaiuina i le aso 30 Iuni 2024, P.P 2023/2024 Nu 35.

E tusa ai ma Tulafono Tumau 134 e amata iloiloga auiliili o le Tulafono Tau Faaofi i ona Faamatalaga.

## FAAMATALAGA MUAMUA

### VAEGATUPE MA TALA FAATATAU

#### MATAGALUEGA

#### TUPE ALU FAATATAUINA

#### FAATOAGA MA

**\$19,967,480.**

**Afioga SULAMANAIA FETAIAI TAUILILI TUIVASA:** Lau afioga i le Fofoga Fetalai, i le vaega o Faatoaga, e na o se faafesili lava, ona o le tulaga lea sa i ai i le Tala o le Tupe 22/23. E i ai le \$140,000, o le polokalame o le manu ainiu. Ae o lea e vaai atu i le tulaga lenei, mo le totoina o le niu. O le totoina o le niu lea na i ai le \$140,000, a o lea ua sau i le Tala o le Tupe lenei ua leai se tulaga. Aemaise o le niu o le malosiaga lena o si o tatou atunuu.

E faafesili atu ai i le afioga i le Taitaifono pe ua leai se tupe e toe faamatuu atu i tua mo le atinaeina o le totoina o le niu. Ma lou agaga faaaloalo lau afioga i le Fofoga Fetalai.

**FOFOGA FETALAI:** Se i tulai mai lau afioga i le Taitaifono.

**Afioga FALEOMAVEGA TITIMAEA TAFUA (Taitaifono o le Komiti o Tupe Maua ma Tupe Totogi):** Faafetai mo le faafesili a lau afioga i le sui usufono mamalu. O le tulaga e pei ona e faafesiligia lau Afioga, o lo o ua faapena ona sologa.... Aua e pei ona e faafofoga atu i le saunoaga a le Minisita, o lo o lelei ona faagasolo... o lo o tuu mai le faatuatuga i tatou tumalo taitasi, e faaoga ai vaegatupe o le miliona, e fesoasoani i le atinae lea. Ma le agaga faaaloalo.

**Susuga Hon LAAULI LEUATEA POLATAIVAO FOSI (Minisita mo Faatoaga ma Faiga Faiva):** E na ona faapulapula atili, e na ona aveese o le tupe lea e \$140,000, ae o lo o i ai fesoasoani tuusao, e le i leva atu ona saina le fesoasoani mai Amerika i le WIPPI, e ova atu ma le \$1 miliona. O le fesoasoani lena, o lea e tuusao lava i lima o le aufaifaatoaga atoa ai ma le mea lea na saunoa i ai le tatou Taitaifono e

fesoasoani ai le tatou fono faavae. E na o le \$140,000 la lea e leai ma i. A o le taamilosaga atoa o le atunuu, ua tuusao lava i lima o le aufaifaatoaga, o lo o nafa ma le tatou faalapotopotoga lea o le WIPPI. Ma le agaga faaaloalo

*Faamaonia le Vaegatupe e \$19,967,480 mo le Matagaluega o Faatoaga ma Faiga Faiva.*

**PISINISI  
ALAMANUIA MA  
LEIPA**

**\$18,926,871.**

**FOFOGA FETALAI:** Se i tulai mai le sui usufono mo Satupaitea.

**Afioga Hon LAUTAFI FIO SELAFI PURCELL:** Lau Afioga i le Fofoga Fetalai, e na o se mea e fia malamalama ai i le Faalapotopotoga lea o le Samoa Business Hub lea sa saunoa le Minisita, e tasi lenei aalapotopotoga o lo o faamoemoe i ai le Malo, i le tau atinaeina o le Private Sector. Ou te tilotilo atu, o lea ua pau le \$50,000 i le tausaga faaletupe ua tea. Ou te fia malamalama pe ua le taua, ua ala ai ona faapau, po o le mea o i ai se isi vaegatupe o lo o tua i ai le... Aua e tasi lenei Faalapotopotoga lau Afioga... ua matua iloga le aoga i tatou atinae laiti, aemaise tatou pisinisi laiti, i le aoaoga o tatou tagata ia iloa fai pisinisi. O lea foi sa taua i le lauga a le Minisita, e taua tele. A o lea ua faapau i lalo le latou tupe. E na ona fia malamalama pe i ai se mafuaaga lau afioga.

**FOFOGA FETALAI:** Se i tulai mai lau afioga i le Taitaifono.

**Afioga FALEOMAVEGA TITIMAEA TAFUA:** E faafetai mo le faafesili a lau afioga i le sui usufono mamalu. O le tulaga e pei ona taua i le... sa fai le talanoaga ma le afioga i le alii pule o le vaega lea o pisinisi ia, o lo o faapena ona sologa lelei. O le vaega foi lea, e na ona tuuese o le vaega seleni lea, ae o lo o faamalieina le faavasegaga o a latou fuafuaga fai, mo le tapenaga o le faamoemoe lea.

Ma le agaga faaaloalo e fesoasoani atu i pisinisi laiti.

**FOFOGA FETALAI:** Tulai mai le Sui o Satupaitea

**Afioga Hon LAUTAFI FIO SELAFI PURCELL:** Faafetai lau Afioga. Toe tasi la le isi mea lea lau Afioga e faapena foi le tatou fesoasoani lea i private sector organization lea sa \$250 afe ao lea foi ua

faapau i le 200. E pei e le o paleni foi le faataua o le mea lea na ou lauga ai. O le faataua o le atinae a le pricate sector ao lea e leo faatino mai e leo reflect i le tatou tupe lea, o lea ua faapau i lalo ma lou faaaloalo.

**FOFOGA FETALAI:** Ia se i tulai mai lau Afioga i le Taitaifono.

**Afioga FALEOVAEGA TITIMAEA TAFUA:** Ia e pei lava o le tulaga lena na ou taua muamua o le tulaga a lena e tasi. E le o i ai se tulaga faapea ua mama i le vaai a le Malo le... Mo le silafia foi e lau Afioga o le a sau silasila silasila i le faiga o le tatou lipoti lenei. O le vaega o le tatou Ofisa o Tupe, e le o se galuega faigofie le faavasegaina o le tatou seleni. E le o aveesea ai la le faataua o le tulaga lea e pei ona e taua. Ma le agaga faaaloalo.

*Faamaonia le Vaegatupe e \$18,926,871 mo Pisinisi, Alamanuia ma Leipa.*

**FESOOTAIGA &  
FAAMATALAGA TEKONOLOSI** **\$11,596,850.**

*Faamaonia.*

**AOGA TAALOGA  
& AGANUU** **\$139,162,748.00.**

*Faamaonia.*

**MATAGALUEGA O TUPE** **\$114,471,307.**

**Afioga SULAMANAIA FETAIAI TAUILIILI TUIVASA:** Lau Afioga i le Fofoga Fetalai, e fia tulai foi lenei Itumalo ona o lea ua oo le Matagaluega o Tupe. Ae le i faia se faauilavea ma se mea taitasi e momoli le agaga faafetai lau Afioga i le Fofoga Fetalai, ona ua tofia foi se tasi foi o tamalii foi o lenei Itumalo Vaimauga 3 e fesoasoani i le Komiti o Tupe aemaise o nisi o Komiti. E momoli ai le agaga faafetai a lenei Itumalo i le faaaloalo ua ave i le sui usufono o le Vaimauga 3.

Ae o le fesili lau Afioga i le Taitaifono, o le mea lea o le Aoga a Leoleo lea sa ave ai le \$100 afe.

**FOFOGA FETALAI:** O lea tonu a le mataupu lea e te fesili ai?

**Afioga SULAMANAIA FETAIAI TAUILIILI TUIVASA:** I Tupe, ona lea ua oo.

**FOFOGA FETALAI:** Matagaluega o Tupe? O lea le i taua atua le aofai o le tupe, onasai mai seiuma ona tau atu, se se i tau onosai mai , tau onosai mai.

**TUPE:** **\$114,471,307.**

**FOFOGA FETALAI:** Ia o lou taimi lenei.

**Afioga SULAMANAIA FETAIAI TAUILIILI TUIVASA:** Lau Afioga i le Taitaifono e fia fesiligia e le sui o le Vaimauga le \$100 afe lea sa tuuina atu mo le aoga faapitoa mo leoleo i le 2022/2023 ia lea ua sau le Tala o le Tupe e leai se mea. Na ona faafesili po o ua faaauau po o ua maea le galuega. Se i onosai mai a aua te fai mea faalii lau Afioga i le Taitaifono.

Lua - O le pamu penisini o lea matau o lea e i ai le pamu penisini sa \$26 miliona a o lea ua sau ua \$3 miliona, o le fesili la lena i tulaga leaga po o lea le mea ua toe oo ai le \$3 miliona le pamu penisini. Ona o lea maua a tala o lo o faatau se pamu.

Tolu - O le aafiaga tumau o le soifua, lea na iai le tatou Tala Tupe 2022/2023 e \$2 miliona \$2.5 a o lea ua sau ua \$2 miliona. O le fesili la poo lea mea ua ala ai ona mafaufau e tataua ona o i luga numera a o lea ua sau e \$2 miliona.

Fa - Tagata Penisione matutua , tala o le tupe sa iai 22/23 e 35 miliona ao lea ua sau e 33 miliona. Mo le silafia nei tei ua e saunoa mai a oti le tagata e toe faaopopo ifo isi tagata lea la atoa le tausaga e 65, a lea sau 35 ae ua sau ua pau.

Forensic Audit - Lea sa 5 miliona ao lea ua sau ua miliona, o le fesili lau Afioga i le Taitaifono , ona o lea iai le malamalamaaga foi o lenei Itumalo . Poo ua iai se faatagana a le Chief Auditor e aumai ai nit agata i fafo o lea foi sa saunoa le Afioga i le Tamaitai Minisita o tulaga faapena.

Ae e te silafia lau Afioga i le Taitaifono o le Okika e tutoatasi a, a o le fesili la i lau Afioga aua o lea sa tou amia, poo ua iai le approval mai le Chief Auditor e aumai ni tagata mai fafo ae aua nei faaogaina ia lana stuff.



O le mea mulimuli - O le ACC. E pei o le tulaga foi lea pe toe faaaauau le isi 10 miliona leaga lea 2 tausaga lea aumai ai ma le agaga faaaloalo i lau Afioga i le Taitaifono.

**FOFOGA FETALAI:** Ia se i tulai mai lau Afioga i le Taitaifono.

**Afioga Hon LAUTAFI FIO SELAFI PURCELL:** Mo le faasaoina o le taimi a lau Afioga i le Fofoga Fetalai.

**FOFOGA FETALAI:** Mo le faasaoina o le taimi lau Afioga i le Taitaifono, se i tuu atu le avanoa i le sui o Satupaitea.

**Afioga Hon LAUTAFI FIO SELAFI PURCELL:** E tasi a si mea sia ou te fiamalamalama ai lau Afioga ona sa ou talanoa ai foi i le mea o lea sai iai I le Samoa Climate Resilience Transport Project lea sa i ai le \$380 afe a o lea ua pau i le \$80 afe po o lea, po o ua maea lea poloketi poo lea me aua le faatauaina faamolemole lau Afioga.

**FOFOGA FETALAI:** A o le i tulai mai lau Afioga i le Taitaifono, se i tuu atu le avanoa i le Minisita o Galuega Tetele.

**Tofa Hon OLO FITI AFOA VAAI:** Malie lau Afioga i le Fofoga Fetalai, na o le faamanatu atu le tulaga o tatou Tulafono Tumau, e tatau lava ona tulai mai le sui ma tau mai le numera o le output e saunoa i ai leaga o lea matou te follow foi ae pei o lea faatalaloa le agai mai o fesili ma le faaaloalo.

**FOFOGA FETALAI:** E sao le fautuaga a le Minisita, o so o se sui a e tulai mai, tautino mai le meatonu a na te fesiligia ai. E le o toe manaomia le faalauaitele o lea ua tatou o i mea taitasi. Se i tulai mai lau Afioga i le Taitaifono.

**Afioga FALEOVAEGA TITIMAEA TAFUA:** Ia malo faafetai, o le a ou amata atu i le faasolosolo atu i fesili a le Afioga i le sui mamalu a Vaimauga 1 e amata atu i le fesili lona 6 lea na mulimuli mai lau Afioga. O le ACC lea le tatou \$10 miliona lea te fesiligia, lau Afioga i le sui mamalu masalo mo le silafia e leai se tatou... talu a na faavae mai tatou tala i mea o siitaga nei e le taitai na faia se tausaga se tasi, e lua tausaga e faatino ai. O le \$10 miliona la lea na aumai i le ACC e faatino ai tatou siitaga mo tausaga ia e 2 ma le agaga faaaloalo.

Tatou see mai i le tatou Audit le Okika Sili po o le Suetusi e pei ona e fesiligia, i le agaga faaaloalo o le vaega lea o le Audit e i ai a latou Ethics. E le mafai na... O le talitonuga ma le... na matou faatalatalanoaina le

Afioga i le Suetusi Sili, o le faamatalaga na tuuina mai e le taitai, e leai ma se agaga faapea o ia te ia, faapea e le fiafia e faataunuu. O lona agaga i le faatinoina o tiute o lo o faapena ona tuu ai le 110%. E le o i ai se agaga faapena o i ai e talia ma le agaga fiafia e le Afioga i le Suetusi Sili le tulaga lea e pei ona e fesiligia.

**Afioga Hon FIAME NAOMI MATAAFA:** Lau Afioga i le Fofoga Fetalai malie ae le i see ese le Afioga i le Taitaifono ma le mataupu lea o le Forensic Audit, ou te tulai atu i le tulaga o faiga faavae, ona e atagia mai i le fesili a le sui o Vaimauga 1, e pei e manaomia le faatagaga a le Okika e fai ai se galuega. O le mea e fiamalamalama ma faasao, e leai e pule a le Malo ia. A manao le Malo e fai le Forensic Audit e fai le Forensic Audit. E i ai a matafaioi a le Okika aemaise lava i le faagaoioiga o galuega faifaipea. Ae leai se na mea lau Afioga i le sui mamalu faapea e tau fesili le Malo pe aumai se faatagaga a le Okika e fai ai le galuega lea.

**FOFOGA FETALAI:** Ia masalo foi ua uma na fai ai le tala a le Fofoga Fetalai anapo i le mea lea, a o lea e lagalaga mai a e le sui lea o Vaimauga 1. O le mea lea se fai ma talia taualumaga ma faamatalaga o tatou fononua ma le umi o le tatou fononua. Se i tulai mai lau Afioga i le Taitaifono.

**Afioga FALEOVAEGA TITIMAEA TAFUA:** O le tatou Penisione lea e i ai tatou... o fesili ia e 2 e kava ai le tatou penisione mo le silafia e lau Afioga i le sui mamalu e lesitala ia tatou tagata afai la o le tulaga lea na lesitala i le tausaga muamua. O lea la e pei ona ou taua, o lea foi o loo faavasega lava i le tulaga la i ai le lesitala. O le mafuaaga foi lea ua iai si tamai pau lea ona o lea e silasila atu le vaega lea e vaaia le tatou Matagaluega lea ua sologa lelei mea uma ma le agaga faaaloalo. Pe i ai se isi mea ua pau?

O le pamu lea la toe tali atu i le pamu lea na misi, penisini o le tatou pamu penisini, o le tulaga lea pei ona e fesiligia, o le a foi le mea na e fia manaomia o le... O le tatou pamu lea ia e sao lelei lau Afioga na matou amia foi le faatalatalanoaina o le vaega lea i le tulaga o le pamu . E \$3 miliona na tatou faatau ai le pamu lea ua i lalo o le Malo. Sa aumai le tau e \$4 miliona ona tatalo lea o le tatou Matagaluega o Tupe maua ai loa lea o le pau e \$3 miliona. Ma le agaga faaaloalo.

**Afioga SULAMANAIA FETAIAI TAUILILI TUIVASA:** Ia lau Afioga i le Fofoga Fetalai ua faamalieina lenei itu. O le mea lea e mimita ai le sui lenei ona o le agavaa o le Taitaifono a o le saunoaga a le Tamaitai Palemia. E pei o le popolega lena lau Afioga ona o mea o tofiga lenei

faaletulafono o lo o i ai a latou malosiaga e faatino ai latou auuaunaga. Ae ui i lea ua malie foi le sui usufono lau Afioga i le Fofoga Fetalai.

**FOFOGA FETALAI:** Ua uma ona fai atu le tala a le Palemia, e le toe faasilia foi se tala a le sui usufono o lea ua saunua le Palemia, e pule a le faigamalo i latou faiga faavae.

**Afioga Hon LAUTAFI FIO SELAFI PURCELL:** Lau Afioga i le Fofoga Fetalai o lea e le i tali mai le Taitaifono i lau fesili na avatu, a o lea toe tasi ma le isi fesili lea la a alu atu.

**FOFOGA FETALAI:** Se i faia lau fesili?

**Afioga Hon LAUTAFI FIO SELAFI PURCELL:** O le output 15, 64... o lea lava tatou te talanoa i le ACC ma le \$10 miliona ae ou te le i faalogo atu lava o sau se faamalamalamaga o le \$1 miliona lea e sau mai le Gambling Control Authority. Po o le mea lea o se dividends poo lea le mea lea po o se tupe e aumai i le Matagaluega lea, Matagaluega foi ia e vaايا tatou taaloga pei o le Bingo ma tulaga na. Lea e sau ai le \$1 miliona lea aumai totonu i i. O le a le sao o lea \$1 miliona faamolemole.

**FOFOGA FETALAI:** Po o ua maua mai lau Afioga i le Taitaifono?

**Afioga FALEOVAEGA TITIMAEA TAFUA:** Ia lea ua maua atu o le tatou \$1 miliona lea aumai le tatou Gambling o le sao lea o le fesili lau Afioga? O lea la e te fia malamalama i le faaaogaina? I le agaga faaaloalo lau Afioga o le tatou miliona lea e le o se dividends o tupe ia o le tatou le \$1 miliona o le budgets support. Ma le agaga faaaloalo lau Afioga.

*Faamaonia le Vaegatupe e \$114,471,307 mo Tupe.*

**MATAUPU TAU VA I  
FAFO & FEFAATAUAIGA** **\$27,205,455.**

*Faamaonia*

**SOIFUA MALOLOINA** **\$146,544,809.**

*Faamaonia*

**FAAMASINOVA MA  
PULEGA TAU FAAMASINOVA** **\$15,572,666.**

*Faamaonia.*

**PUNAOA FAALENATURA  
& SIOSIOMAGA** **\$29,374,460.**

*Faamaonia.*

**LEOLEO & FALEPUIPUI  
& TOEFUATAIGA** **\$55,701,690.**

*Faamaonia.*

**PALEMIA** **\$9,583,853.**

*Faamaonia.*

**TIUTE MA TUPE MAUA** **\$13,441,55.**

*Faamaonia.*

**TINA MA TAMAITAI & ATINAE  
O NUU MA AFIOAGA  
MA AGA FESOOTA** **\$64,755,036.00**

*Faamaonia.*

**GALUEGA, FELAUAIIGA  
& ATINAE ESEESE** **\$42,779,504.**

*Faamaonia.*

**LOIA SILI** **\$5,840,075.**

*Faamaonia.*

**PULE MA SUETUSI AOA** **\$4,492,999.**

*Faamaonia.*

**KOMISI O FAIGAPALOTA** **\$4,226,735.**

*Faamaonia.*

**FONO AOA FAITULAFONO** **\$8,227,199.**

*Faamaonia.*

**KOMESINA O SULUFAIGA** **\$1,683,902.**

*Faamaonia.*

**KOMISI O LE`  
AUFALUEGA O  
GALUEGA A LE MALO** **\$10,530,220.**

*Faamaonia.*

**OFISA O FUAINUMERA FAAMAUINA** **\$5,789,365.**

*Faamaonia.*

**GALUEGA TAU ALAMANUIA  
MAATINAE A LE MALO** **\$7,840,279.**

*Faamaonia.*

**KOMISI O LE TOE FUATAINA  
O TULAFONO O SAMOA** **\$1,506,886.**

*Faamaonia.*

**AOFAI TUPE ALU AOAQ  
FAATATAUINA 2023/2024** **\$759,261,445.**

*Faamaonia.*

**FUAIUPU 2: Faamatuu atu ma le Faatatauina o le \$759,261,445  
mai le Faaputugatupe a le Matagaluega o Tupe.**

*Faamaonia.*

**FUAIUPU 3: Faamatuu atu ma le Faatatauina o le \$441,461 mai le  
Teugatupe a le Tausi Mavaega a le Malo.**

*Faamaonia.*

**FUAIUPU 4: Faamatuu atu ma le Faatatauina o le \$22,777,843 mai  
le Faaputugatupe o le Matagaluega o Tupe.**

*Faamaonia.*

**FUAIUPU 1 MA LE IGOA**

**FUAIUPU Igoa puupuu ma le amataga**  
**IGOA Faatatauina o Tupe 2023/2024**

*Faamaonia.*

*Na faagasolo le Tulafono Tau Faaofi o le Faatatauina o Tupe 2023/2024 e aunoa ma se Teuteuga.*

**TULAFONO TAU FAAOFI O LE FAATATAUINA O TUPE**  
**2023/2024 - faitauga faatolu**

**FOFOGA FETALAI:** Tulai mai lau Afioga i le Minisita o Tupe.

**Afioga Hon MULIPOLA ANAROSA ALE MOLIOO:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o le Faatatauina o Tupe 2023/2024 i lona faitauga faatolu.*

*Faaluaina e le Minisita mo Leoleo ma Falepuipui, Minisita o le Soifua Maloloina, Minisita o Fesootaiga ma Faamatalaga Tekonolosi, Minisita mo Punaoa Faalenatura ma le Siosiomaga.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoao Faitulafono.*

*Na faaalua le agaga fiafia o le Maota e ala i le patipati o latou aao i le pasia ai o le Tulafono Tau Faaofi o le Faatatauina o Tupe 2023/2024.*

**FOFOGA FETALAI:** Malo le onosai ua talafeagai lelei lava ma le tatou taimi faatulagaina.

E manatu ua tataua ona fai se tatou malologa ua tolu vaiaso o tatou feagai ma Fonotaga aemaise lava o le tatou Tala o le Tupe e pei ona pasia nei. O le a alaala ia le toa na i Talitaliaai ma amo lona vaa faasavili ina ua pale i galutuu seegapapa a le tupu e pei o le muafetalai i le malae o tea malosi. O lea ua faalepa le fua o le tatou Maota ma tatou aleaga ina ua toi'u le tapagai'a na i le gataifale o le uluai Tumua, ua faamalo le alei, ua faamalo le pale ma le folau ua se togi na seu lagatila ma ua faapulou i le tualima ua faamalo le fai o le faiva. Ua tau

manuia le tatou Fono faaumiumi sa tauasa mai i le tau faamaeaina o le tatou Tala o le Tupe, faamalo faafetai le faatoatoa. E lagona lava le fiafia o le loto i lo outou onosai ma la outou lagolago mo le uunaia o la tatou galuega aemaise o le amanaia o se taumafai atu a le Fofoga Fetalai. O fonotaga mo Tala o le Tupe o se fonotaga taua tele mo lo tatou valaauina i so o se tausaga Faa-Palemene, ona o le laasaga lea e faataoto ai le fatu ma le faavae o se Tamaoaiga Autu mo le atunuu

Faafetai mo saunoaga, faafetai mo le tofa ma le uta fetalai i le paia o le Palemene, o lea ua taoto tuualalo ma fautuaga e lagolago ai le sa o le Malo, ae tatou tatalo pea i le Atua ua na o Ia e atoa ai so o se mea lelei tatou te manatu iai.

E fia momoli foi le faamalo ma le faafetai i lau Afioga i le Tamaitai Palemia ma le faigamalo, ua laulausasa a outou faiva ona o le alofa ia Samoa, ua molimau foi le Maota ma le atunuu o se uluai Tala lea o le Tupe ua ausia le piliona, o faailoga ia o se aleiga e oloolopitovaa o le molimau foi o se faiva na saili i le loloto o le moanauli a o se taunuuga foi o se galuega sa faufau i le faatuatua. O le a se mea ua lelei ona tatou fai ia fai lea ma viiga o le Atua ae ia sagai ane ai o le tai, ia faatofa mai le lagi so outou finagalo e afaafa ai lo outou sa folau mo se ai o le tapuaiga o le atunuu a ia sili mo se viiga o le Atua o lo o Faavae ai Samoa.

Le paia e o le Palemene, pe afai ua i ai se faaletonu i le taitaiga a le Fofoga Fetalai i taimi o tatou taualumaga ia outou finagalo malilie faamagalo se aleu. E faamoemoe atu le Nofoa i lo outou finagalo faale-Atua. Samoa ma lau tapuaiga e le toe asaina e sa matou gagana le vaofilifili i ou paia faalupelupeina i le afua mai i tumutumu mauga seia paia fanauiti. E momoli atu le matou faafetai tele i lau tapuaiga. O le mana foi o au tatalo ua manuia faiva o lau Palemene, pe afai ua i ai se gagana a lau Palemene ua sala i lau faafofoga tapuai mai ia matou te faatoese atu ia e alofa faatafea i nuu le aina. O le tatalo ia i ai pea le agalelei o le Atua i so tatou atunuu.

I Ofisa Sili o Pulega o Matagaluega ma Faalapotopotoga Tumaoti a le tatou Malo, malo tapuai faafetai le tautua, ia saga faamanuia le Atua i lo outou valaauina. Ia faafetai atu foi i auaunaga uma o lo o faia pea le tautua faaauau mo le Palemene i aso fono taitasi ia faamanuia le Atua i la outou tautua. Pe a tatou tau mavae i lenei aso, ia agalelei le Atua i lo outou afifio atu, manuia tele faigamalologa o le faaiuga o le vaiaso aemaise o le tatou agai atu i le tatou Sapati Paia.

Ae tatou te le i tolopo ou te talosaga atu i le sui usufono mo Aana Alofi 3 se i e saunia se tatou tatalo e faai ai le tatou Fono.

***Na tolopo Taualumaga a le Fono Aoao Faitulafono i le itula e 12:09 i le aoauli seia aulia le Aso Lua, 4 o Iulai 2023 i le itula e 9:30 i le taeano.***